

sophicas; Ernestii, Mori, Thalemani, Antonii, theologicas atque philologicas solertissime frequentavit. Laudat istorum omnium doctrinam et fidem, spondetque solennibus formulis, se illorum institutioni gratissimam omni tempore memoriam adhibiturum. Anni initio Magistri Artium honores ab Amplissimo Ordine petiit, quos, quod et doctrinae copia, et suavitatem morum, commendaretur, Diplomate publice proposito, merito consecutus est.

HENRICVS MICHAEL HEBENSTREIT

LIPSIENSIS

Jur. Baccal et Not. Publ. Caes.

Natus est anno huius Seculi XLV, patre Johanne Ernesto, Facultatis medicae Decano, viro de literis immortaliter merito; matre adhuc superstite, Christiana Eugenia, e gente Bosseckia. Primae aetatis annos doctrina fideliter rexerunt magistri privati, Küchlerus A. M., Apelius, Kellnerus A. M., Gottleberus A. M. Patre anno LVII. mature orbatus, gravius erat tristissimum casum laturus, nisi luctus domestici acerbitatem leniuisset tum optimae matris cura, tum affinis Scharffii A. M. ad aedem Nicolai Diaconi, in tutela gerenda fides quam multis documentis spectatam grata mente recollit. Inde in Scholam Senatoriam deductus, rectore t. t. Haltausio A. M. praeceptoribus profecit Adamio A. M. et Reiskio, quem utriusque sermonis, graeci praecipue, magistrum sibi contigisse magnopere laetatur. In hebraicis potissimum literis Mittentzweii et Thiemii opera profuit; in mathematicis disciplinis Funcii assidua institutio. Nomen inter ciues Academicos professus anno LXIV. rectore Boehmio, fautore suo imprimis colendo, in universa Philosophia secutus est Wincklerum, ac postea Crusium, cui etiam doctrinam christianam tradenti, et scholas disputatorias habenti, operam dedit. Sub idem tempus avunculi, Bosseckii, hebraicis praelectionibus interesse ei datum est. Mathesin Funcio duce porro excoluit. Philosophiae, et religionis reformatae historiam, a Burschero accepit. Gellertum, de moribus praecipientem, audiuit. Literarum humanitatis causa Ernestium, Isocratis Evagoram interpretantem, Historiam

item